

四庫全書

經部

欽定四庫全書

四書辨疑卷十三

元 陳天祥 撰

孟子

盡心上

殀壽不貳○註貳疑也

疑字意不的切貳固訓疑亦訓携貳變異也註又言  
盡心知性而知天所以造其理也存心養性以事天  
所以履其事也以此推不貳之義由造理言則不疑

為順由履事言則不變為長殤壽不貳正在發於行事處言之蓋誠一不二無有變異之意也說者宜曰殤壽惟一不變所守修身以俟其終也

強恕而行求仁莫近焉○註強上聲強勉強也恕推己以及人也反身而誠則仁矣其有未誠則是猶有私意之隔而理未純也故當凡事勉強推己及人庶幾心公理得而仁不遠矣

己所不欲勿施於人曰恕然其不施之心有勉強之

不施亦有不勞勉强之不施恕則亦有誠與不誠之  
異未可通謂猶有私意之隔也已所不欲之事勉强  
不施於人此非自然之恕固猶有所未盡於誠不勞  
勉強自然不肯施之於人此為自然真誠之恕然亦  
未至於仁也仁恕之分予於論語吾亦欲無加諸人  
可謂仁之方也已之兩章已有其辨蓋恕者止能推  
己不欲之不善不以及人未能至於以善及人也再  
進一階推己之所欲以及於人如老吾老以及人之

老幼吾幼以及人之幼已欲立而立人已欲達而達人之類是謂以善及人至此則為仁矣若以強為勉強而行望其自然之恕猶有限隔於仁豈有莫近之理強當讀為平聲自強不息之謂也人心但能不肯以惡及人便有以善及人之意在其中矣但未發見以及於物耳恕與仁之地位緊相挨次人能自強於恕力進不已進得不以不善及人之境便能以善及人故曰求仁莫近焉也

行之而不著焉習矣而不察焉○註著者知之明察者識之精言方行之而不能明其所當然既習矣而猶不識其所以然所以終身由之而不知其道者多也

光顯彰著雖皆訓明然其明皆在外非內照之明也如言聲迹顯著事業昭著此皆著字用當其分者也若以明明德為著明德明於庶物為著於庶物必不可也今以著為人心知識之明誠為未是此著字止當如聲迹顯著之著為說察為識之精亦非程子以

察為省察宜取為正蓋行謂行君子之所行習謂習君子之所習行君子所行而不能顯著由其信之不篤也習君子所習而不能省察乃其學而不思也惟其信之不篤學而不思雖亦行其君子所行習其君子所習而終身不知其道者多也

不恥不若人何若人有○註但無耻一事不如人則事不如人矣或曰不恥其不如人則何能有如人之事其義亦通

註文前說改不字為無字義便難解學者疑為兩說  
一說但其無恥之一事既不如人則事事不如人一  
說但於一件事有不如人處不以為恥則事事不如  
人未知註文果主何說若主學者前說無恥一事不  
如人此言甚駭正如說為姦一事不如人為盜一事  
不如人者無異是皆何等語邪若主學者後說又有  
責人太峻之病君子於小知小能多不用心因一小  
技不如人而不以為恥便謂事事皆不如人豈通論乎



前說兩意皆無可取況經中亦無分別一事事事之  
文不恥不若人五字昭然在人目中止是言自己立  
心為人不如人處不自知恥而無見善思齊之志何  
能有如人之善此與心不若人則不知惡之語意相  
類或曰之說意是

霸者之民驩虞如也○註程子曰驩虞有所造為而然  
楊氏曰所以致人驩虞必有違道干譽之事

虞與娛同古字通用五霸之術無他以力假仁而已

造為干譽皆不必言致人驩虞乃其假仁之效也大  
抵昏虐之世民罹殘暴甚於倒懸幸有肯假仁義之  
君使民得蒙一時之惠如飢者甘食渴者甘飲驩虞  
之情蓋以此也

殺之而不怨利之而不庸○註豐氏曰因民之所惡而  
去之非有心於殺之也何怨之有因民之所利而利之  
非有心於利之也何庸之有

非有心於殺之者是非有心於利之者非聖人以博

施濟衆為心王政以安人利民為本命義和之官歷  
象授時察璿璣玉衡以濟七政平治水土播時百穀  
敬敷五教順理庶工至於堯以不得舜為已憂舜以  
不得禹皋陶為已憂皆所以思濟斯民孜孜汲汲惟  
恐不及何嘗無心於利民哉無利民之心非聖人之  
徒也豐氏之說殺之與利之同謂之無心豈不繆哉  
庸功也利之而不庸者不以利已者為有功而無知  
感驩虞之心也蓋王者之民生長於雍熙盛化中未

嘗見衰世之事視國家宇民之道習以為常惟知利澤已所當得安豫已所固有帝力何有於我哉此其皞皞然自得之心利之而不以為功也

得天下英才而教育之○註盡得一世明睿之才而以所樂乎已者教而養之則斯道之傳得之者衆而天下後世將無不被其澤矣

英才世不多出不可以衆言如孔子之有顏曾自足為樂若直須盡得一世之才皆來受教然後始以為

樂孟子本意恐不如此天下人才實無定數豈容以  
盡得為期縱有定數亦無盡得教之之理天下英才  
盖指天下人中傑出間有之才而言非普言天下所  
有之才也如司馬懿歎稱天下奇才亦止是稱道孔  
明一人未嘗以天下為普言也天下英才正與此同  
得如此英傑明睿之才教育之使聖人大道傳得其  
人功及後世所樂在此也

流水之為物也不盈科不行君子之志於道也不成章

不達○註成章所積者厚而文章外見也

章字解為文章與上句水不盈科不行之喻義不可  
通毛晃韻略成事成文曰章仍引孟子此文不成章  
不達為據義亦未盡此章字惟以為學之次第言之  
乃可說也章猶事目倫序也達通也言君子志在於  
道若所學不成倫序則不可通也物有本末事有終  
始自格物以至平天下自親親以至愛物自明善以  
至獲於上如此之類不能徧舉學者必當知所先後

循序漸進成了一事然後再成一事道乃可通譬如  
水之流行注滿一科然後再注一科斷無越此注彼  
可通之理也

所惡執一者為其賊道也舉一而廢百也○註為我害  
仁兼愛害義執中者害於時中皆舉一而廢百者也

經文中所惡執一者以下皆重言子莫執中之病文  
理甚明舉一而廢百言其執一廢百也為我兼愛二  
事無預於此註文以三者通言皆舉一而廢百非也

說者宜云執中無權害於時中舉一而廢百也

仲子不義與之齊國而弗受人皆信之○註仲子設若非義與之齊國必不肯受齊人皆信其賢然此但小廉耳其避兄離母不食君祿無人道之大倫罪莫大焉豈可以小廉信其大節而遂以為賢哉

以萬衆之國與之果能卻之而不受雖夷齊無以加也註猶以為小廉天下廉者復有大於此者乎仲子不義與之齊國而弗受者蓋當時齊人嘗有此言孟



子以此為人之大節非仲子所能而不之信也人皆信之者言其信上句所言將謂實能不受也註文以為人皆信其賢經中本無賢字意脉蓋所以就其小廉為說也既以不受齊國為小廉又謂以小廉信其大節不知又指何事為大節也仲子不食其兄所得之祿又嘗哇其鵝肉以此致有廉士之譽孟子謂此不足為廉故舉嘗所論者簞食豆羹之說以喻仲子所為無異於此蓋常人之情於細微之物多能忍其

欲心而不輕取及見多廣貴重之物得之足以去貧  
賤而處富貴於是平昔所匿之欲心奮然而起不復  
顧其禮義廉恥而取之矣以仲子視萬乘之齊斷無  
與之不受之理孟子所以知其然者蓋於人倫之間  
察見之也人之惡行莫大於叛人倫仲子避兄離母  
棄祖宗世卿之業而不居是無親戚君臣上下幾仁  
義而不顧也於齊國見與之際寧復有羞惡辭讓之  
心哉人但因其不食兄祿之小廉而遂信其真能不

受齊國之大節何可哉此章移於前篇陳仲子豈不誠廉士哉之下義則易見

夫有所受之也○註言臯陶之法有所傳受非所敢私雖天子之命亦不得而廢之也

以傳受抑天子之命使不得廢亦似難憑昏亂之世有司之法非無傳受而皆為其所廢渠亦何嘗有忌於傳受哉惟以公心期之則無擅廢之理五刑有服惟明克允此舜之所以命臯陶而臯陶受之於天子

者也。皋陶受此明命，固自非所敢私。惟知明於五刑而已。舜既嗣堯之法，而以公天下之心，命之豈得復以瞽瞍之子為心而廢之哉？受之言皋陶，受之於天子也。

居移氣，養移體。○註：居謂所居之位，養奉養也。言人之居處所繫甚大。王子亦人子耳，特以所居不同，故所養不同，而其氣體有異也。

經文初言「居移氣，養移體」，繼而言者大哉，居乎其居。

使之然也居天下之廣居魯君呼於埴澤之門皆敘  
居移氣之義為說略不再言養移體者蓋居移氣本  
是一章正義養移體乃是兼設譬喻之言而註文無  
所分別使養與居通混體與氣均齊並列於孟子稱  
羨中抑亦不思之甚也夫氣之為用大矣賢者養之  
惟恐有餒故孟子見王子之氣得其居處地位之助  
而有心廣體胖之貌乃稱羨之不為無取若見其身  
體得所奉養顏貌肌膚有豐潤肥澤之美而咨嗟歎

羨此何義也孟子於此本因有所感激而言大抵常  
人之情随物輕重位卑則氣卑位盛則氣盛正如奉  
養薄則體羸弱奉養厚則體豐碩今王子因有是位  
則有是氣外物所資尚能如此况居天下之廣居其  
氣又豈止此而已所謂浩然塞乎天地之間者豈不  
信哉大哉居乎蓋謂此也孟子稱歎之意本不在於  
養移體也

形色天性也惟聖人然後可以踐形○註人之有形有

色無不各有自然之理所謂天性也踐如踐言之踐盖衆人有是形而不能盡其理故無以踐其形惟聖人有是形而又能盡其理然後可以踐其形而無歉也

註昏不知指形為何等之形色為何等之色何者為自然之理也形有骨肉軀體之形亦有動作容貌之形若指骨肉生成之軀體為說孟子言形色天性也人之軀體果可以為天性乎後又單說踐形於色字再不相干義皆未易可曉形色二字本是一意通取

動作容貌而言人與事物相接各有理所當然之容貌隨之居尊貌必莊嚴處卑貌須恭謹弔則有憂戚之容慶則有喜悅之色如此之類皆其性中之善物發於外而見於面施於四體為性之用故言形色天性也然有色厲內在色取仁而行違之欺雜於其間在小人則無時而無於君子亦有時而有惟聖人之德表裏渾全心與容貌動皆相應有莊嚴形色有莊嚴之心有恭謹之心有恭謹形色至誠於心以實其



貌是之所謂踐形也

君子之所以教者五有如時雨化之者○註時雨及時之雨也草木之生播種封植人力已至而未能自化所少者雨露之滋耳及是時而雨之則其化速矣若孔子之於顏曾是也

註文但說雨露草木生化之意而於孔子之教顏曾絕無一事相關言時雨化則云若孔子之於顏曾言成德則云如孔子之於冉閔不知孔子之教顏曾與

其教冉閔者果有何異以所教何事為時雨化何事  
為成德皆無所指之實如謂孔子於冉閔為成德於  
由賜為達才於樊遲為荅問然夫子於由賜非無成  
德之言於樊遲非無達才之義於冉閔非無荅問之  
辭五者之教自有五般實事但當明言其事不可謾  
指其人自上而下鼠尾相次而言也如夫子之立之  
斯立道之斯行綏之斯來動之斯和為中都宰一年  
四方則之攝行相事三月魯國大治所施普及於衆

無有不霑其化者此其如時雨化之之謂也主忠信  
徙義克己復禮見賢思齊此皆成德之謂也可使治  
其賦可使為之宰可使與賓客言此皆達才之謂也  
荅其問仁荅其問知荅其問孝問政問鬼神各隨所  
問而荅之此皆荅問之謂也又註文解私淑艾以為  
人或不能及門受業但聞君子之道於人而竊以善  
治其身是亦君子教誨之所及予謂五者之中四者  
皆言教人惟私淑艾者却是受人之教與上四者意

不倫矣前篇予未得為孔子徒也章與此一節皆以私淑為言彼是孟子自謙之辭此論君子教人之法彼言私淑諸人此言私淑父二私淑之義本難同說此間無用謙辭處止當解私淑為自善父治也義與太甲自怨自艾之艾同躬修善行使人儆之以自身之善化導治人故曰私淑父也南軒曰私淑父者蓋不在於言辭之間躬行而觀者化焉此說意是夫子溫良恭儉讓所至之處人皆自以國政告之自善其

身所過者化蓋亦君子為教之一大端也

君子引而不發躍如也○註引引弓發發矢也躍如如  
踴躍而出也君子教人但授之以學之之法不告之以  
得之之妙如射者之引弓而不發矢然其所不告者已  
如踴躍而見於前矣

吾無隱乎爾我叩其兩端而竭焉聖人之教人如此  
未嘗見有不肯盡者今言不告以得之之妙果何心  
哉如云踴躍而出踴躍而見於前不知躍出面前跳

躍如此果何物也予於君子之下引而不發躍如也  
之七字疑皆羨文去此七字上下通讀是否自見  
中道而立能者從之○註中道而立言其非難非易能  
者從之言學者當自勉也

中道而立解為非難非易能者從之解為學者當自  
勉皆不可曉孟子之言本以正公孫丑所請之謬中  
道乃其理所當然不可易之正道也中道而立能者  
從之蓋言教人之法但當守此正道而立能者從其

所教而行其不能者止不可為彼不能而改此正道也

未聞以道殉乎人者也○註以道從人妾婦之道也

此乃襲前篇景春問公孫衍張儀之註文為說從人謂阿諛苟從也以道則不苟從人苟從則非為以道既能以道又苟從人無是理也妾婦之以道從夫乃其理所當然非謂阿諛苟從也孟子本言有道之士無以私殉人之理惟不以其道則殉乎人故曰未聞

以道殉乎人者也

其進銳者其退速○註進銳者用心太過其氣易衰故退速

註文過字意差用心太過乃思慮過深也思慮過深者遇事必不輕進正與進銳者意氣相反從銳字看止可言用心太猛其進銳者乃是猛銳輕進之人猛而輕進者其氣易衰所以退速故勇者必以沉勇為貴也此七字與上文意不相類當自為一章首闕孟



子曰三字

君子之於物也愛之而弗仁於民也仁之而弗親親  
而仁民仁民而愛物○註物謂禽獸草木愛謂取之有  
時用之有節程子曰仁推己及人如老吾老以及人之  
老於民則可於物則不可統而言之則皆仁分而言之  
則有序

註言取之有時用之有節此只是節其費用不使致  
有匱乏而已以此為愛正與百姓皆以王為愛也之

愛相似此本智者吝惜之愛非仁愛之愛與親親仁民之理差矣程子之說解仁民一節其理誠是然於親親愛物皆置而不說亦為未盡所謂親親者子之於父冬溫夏清昏定晨省至樂根於心而愉色婉容見於外如老萊子衣斑斕之衣仆地作嬰兒啼以悅其親其孝愛發乎天性者如此至於慎終追遠哀慕祭祀死而後已其罔極之思又如此父之於子欲其壽欲其賢欲其富貴顯達鍾愛之深慈育之至亦有

不可勝言者此皆親親之道但可施之於親不可施之於民也所謂仁民者所惡與之去之所欲與之聚之足其衣食教以人倫使老幼遂其生上下安其分此皆仁民之道但可施之於民不可施之於物也所謂愛物者如齊宣王憫其牛之觶觶鄭子產樂其魚之得所至於當春草木不忍摧折行視螻蟻不忍踐傷此皆愛物之道是為仁愛之愛與親親仁民之心同是一本然而有此差等不齊是之謂理一而分殊

吝惜之愛無與於此親親之道自然不可以及民仁  
民之道自然不可以及物故曰於民仁之而弗親於  
物愛之而弗仁也

盡心下

各欲正己也○註民為暴君所虐皆欲仁者來正己之  
國也

經文上句言征之為言正也本說征人者所以正人  
也註文解此句為皆欲仁者來正己之國却是受征

者欲人正己意與經文不同各欲正己也此是自解  
上句正字之義蓋言王者之征以義正人欲其畏威  
悔過各正己之不正故曰各欲正己也

好名之人能讓千乘之國苟非其人簞食豆羹見於色  
○註好名之人矯情干譽是以能遜千乘之國然若本  
非能輕富貴之人則於得失之小者反不覺其真情之  
發見矣

惡名無不惡之者善名無不好之者然其矯情節詐

務以欺世違道干譽賣直邀名斯固可鄙果於義利之間明其去就於其不義雖萬鍾之祿不受當其可讓雖千乘之國不吝如此以保令名非不善也古之能讓千乘之國者太伯仲雍伯夷叔齊子臧季札寥寥千古數人而已若皆以為矯情干譽則是萬世無遜讓之賢也況聖人亦嘗言君子疾沒世而名不稱焉君子去仁惡乎成名揚名於後世以顯父母令聞廣譽施於身若此類者聖人豈以名為不美而無欲

之之心哉但聲聞過情則恥之耳近世講學皆謂聖人不當有尚名之心凡於經傳見有顧惜名聞之言多為曲說以諱之必使化真為偽而後已儻能各於惡名善名之間私自忖其惡欲之誠亦必覺其在己之善名果無不欲之理也所謂矯情干譽者又當知其情之受矯各有輕重亦有不容其矯者大抵取與之際於物之輕者矯之易物之重者矯之難至其物之尤重有關於富貴之大者雖欲矯之不可得也今

言以千乘之國矯情與人恐無此理或曰子噲亦能以燕為讓豈非矯情干譽者乎予應之曰子噲老耄昏瞶子之以計奪其國謂為讓則非也謂之能讓又非也能讓者讓於可讓之賢者也夫千乘之國亦富貴之極位也一旦自舉以讓賢非有義烈誠肯之心者定不能也註猶以為本非能輕富貴之人此與解仲子不受齊國為小廉之說無異不受齊國者為小廉讓千乘之國者為矯情干譽然則廉讓之士復有



何事可為以此垂示後人廉讓之道廢矣豈不有傷風教哉況其人二字本指上文好名之人而言今以為本非能輕富貴之人一其字中間豈有如許之意邪孟子之言本謂果能慕好令名之人雖千乘之國亦能讓之而不吝也苟非有此志操之人雖簞食豆羹之微物將欲與人其鄙吝之心亦必見於顏色也稽大不理於口○註理賴也今案漢書無俚方言亦訓

賴

理俚本是兩字理亦自有義訓不可就俚字之訓解  
為賴也理整治也舊說云稽大不能治人之口此說  
為是蓋謂衆口紛亂之言不能整治也

山徑之蹊間介然用之而成路○註介音憂徑小路也  
蹊人行處也介然條然之頃也用由也路大路也

人行處與小路不知如何分別蹊與徑相混無別則  
經文不可解矣又以介音憂介然解為條然之頃亦  
甚費力江南廣韻中原韻略南北玉篇介字皆無音

憂者惟中原廣韻毛晃韻略兩處有之然亦未嘗訓  
條也况山徑之在茅棘中條然之頃由之恐無便成  
大路之理蹊與左傳牽牛以蹊人之田之蹊字義同  
蹊猶踐也間猶初間也介如字經文當以山徑之蹊  
間介然為句言其山徑之初為踐之之間介然微分  
於草棘中往來由之而不止遂成大路少間不用則  
茅草生而塞之矣山徑喻心茅喻物欲心不修治而  
物欲之私充塞也

君子用其一緩其二用其二而民有殍用其三而父子  
離○註征賦之法歲有常數然布縷取之於夏粟米取  
之於秋力役取之於冬當各以其時若併取之則民力  
有所不堪矣

取之各以其時乃古今不易之常法不可謂之為緩  
也大抵孟子所言非古征賦什一之法蓋指當時之  
事而言用謂費用重取之也緩謂寬緩輕取之也三  
者之中其一既重取之餘二者取不盡數此謂用其

一而緩其二也若重取其二惟輕其一民已有殍若三者俱重則有父子相離者矣近代以來往往於賦稅正額之外別立名色橫加掊斂如趙光奇對德宗者是也若此類者取雖各以其時民亦豈能免於飢餓流離之患哉唐制每丁歲役二旬有事而加役者旬有五旬免其調三旬則租調俱免此亦用一緩二之意也

若是乎從者之謬也○註或問之者問於孟子也言子

之從者乃匿人之物如此乎

匿人之物如此乎乃是窘斥孟子之言直指從者為盜可謂無狀之甚者也既發如此麤蘊之言如何便能有殆非也以下禮順之語盖若者疑而未定之辭若是猶莫是也言莫是從者之所匿也以此為問則其氣本柔和與殆非也以下之言可有相接之理

君子之言也不下帶而道存焉○註古人視不下帶則帶之上乃目前常見至近之處也舉目前之近事而至

理存焉所以為言近而指遠也

經文本說言不下帶註文却說視不下帶意不相干  
雖其目之所視下不過帶却不知口之所言果言何  
事豈可便以為言近乎又不知舉目前之近事果指  
何者為近事至理存焉果指何者為至理意皆不明  
蓋經典聖人之言垂世以教後人大要只是理會方  
寸之心如存心養性誠意正心其事則仁義禮智孝  
弟忠信所言皆在一心境中不離胸臆之間故曰君

子之言不下帶也此與下文修其身而天下平乃是  
自解上文言近指遠守約施博兩節之義言不下帶  
所謂言近也而有修身齊家治國平天下之道存焉  
所謂指遠也修其一身所謂守約也致天下平所謂  
施博也

人病舍其田而芸人之田○註此言不守約而務博施  
之病也

此一節本言不守約之病與博施意不相干芸人之



田非博施也經文下兩句自解此文已了所求於人者重此是自解芸人之田一節之意求與有諸已而後求諸人之求字義同求責也分明說求於人者重何嘗言其有博施之病哉舍其田而芸人之田蓋謂不自治已而專務治人也南軒曰不務其在已者而責諸人此為得之

欲得不屑不潔之士而與之是獮也○註狂有志者也獮有守者也有志者能進於道有守者不失其身

志者心之所之狂與獯各有其志非獨狂者有之也  
但狂者志不務近而專慕遠為獯者志不慕遠而專  
務近守此為異耳南軒曰狂者所知進於高遠獯者  
所守執之堅介此說為得註文又謂狂者能進於道  
義亦未安正為嚶嚶然志慕高遠言不顧行行不掩  
言不務進道之實故謂之狂也然其所期既已高遠  
則外物不能為累行雖不得其中於道亦有可進之  
理不可謂之能進也能進於道惟中行之士可以當

之若獯者立心堅介外物亦不能為累與狂者皆能  
得其道之一邊故孔子不得中行之際均思之也由  
是言之獯者亦有進道之理豈獨狂者為然不失其  
身亦非不進於道者能之也

四書辨疑卷十三

欽定四庫全書

四書辨疑卷十四

元 陳天祥 撰

中庸

○註中者不偏不倚無過不及之名

程子以不偏為中呂氏以無過不及為中二說之意  
本同註文通言之是也或問中却分為兩意說不偏  
在未發之前說無過不及為見諸行事以為方其未  
發未有無過不及之可名抑不思人之氣稟鮮有得

中者過於剛則仁有不及過於柔則義有不及氣太  
嚴者必少恩心太慈者必少斷過與不及心實主之  
先有諸內然後見諸行事也若其氣稟無有所偏則  
於未發之前亦有無過不及之可名何不可之有哉  
至於不偏不倚亦不可專說在未發之前若於行事  
得中亦可以不偏名之也信如或問之說則程子止  
是言未發之中未嘗言行事之中也呂氏止是言行  
事之中未嘗言未發之中也有上截者無下截有下

截者無上截不知程呂之意何故如此或問又以不  
偏為心之體地之中無過不及為理之當事之中亦  
不知心之體與理之當如何分地之中與事之中如  
何辨又云二義雖殊而實相為體用語錄曰未發之  
中是體已發之中是用亦皆過論凡言體用者乃是  
一物而有兩分之名如根梢枝葉相須為義耳若以  
中和言之中為體和為用乃可說也單獨一中而有  
體用之分無是理也夫中之在心物來則應猶鏡中

之明刃中之利也如以未照之明為體已照之明為用未割之利為體已割之利為用可乎未照之明與已照之明只是一箇明未割之利與已割之利只是一箇利未發之中與已發之中亦只是一箇中不偏與無過不及亦只是一箇意言不偏則無過不及在其中言無過不及則不偏亦在其中只註文當為定說或問之說不講可也

天命之謂性率性之謂道○註命猶令也性即理也天

以陰陽五行化生萬物氣以成形而理亦賦焉猶命令也於是人物之生因各得其所賦之理以為健順五常之德所謂性也率循也道猶路也人物各循其性之自然則其日用事物之間莫不各有當行之路是則所謂道也

孔子言性相近也孟子道性善本皆專論人之性未嘗普該萬物之性也子思說天命之謂性率性之謂道亦是專以人性人道為言註文乃以萬物與人一



混言之誤矣所謂人物之生各得所賦之理以為健順五常之德者五德俱全復加健順惟人有能之之理彼禽獸昆蟲等物何嘗能有如許之德哉天地之間知覺運動之物其性於五常之中固有頗能近之者或近於仁或近於義雖於天理中粗有通處亦不可便與人同一槩言有健順五常之德也註文又見率性一節於萬物之性難以盡循故再指物為日用之物亦不可通物無皆能自為人用之理語錄又以

馬馳牛耕佐註文為說蓋亦未之思也馬須用銜牛  
須穿鼻既制奔突又加鞭箠然後始可為用亦猶戕  
賊杞柳以為栢棬非謂循其性之自然也況天下萬  
物知不能盡豈皆得在日用之間乎凡彼不為人用  
之物其性尤有不可循者如虎狼之暴蛇蠍之狠皆  
其本然之性也若循此性以為道果何道邪只如荆  
棘稂莠生於道路隴畝之間亦無任其叢茂不除之  
理語錄曰人與物之性皆同循人之性則為人之道

循馬牛之性則為馬牛之道此話益難憑準既言人  
物性同又卻自有人性物性人道物道之分何也循  
馬牛之性則為馬牛之道若循虎狼之性則亦為虎  
狼之道循蛇蠍之性則亦為蛇蠍之道循荆棘稂莠  
之性則亦為荆棘稂莠之道果修此道以為教使天  
下後世遵之而行將見獸蹄鳥跡之道復交於中國  
區宇永為鴻荒聖人之教寧有是哉若以註文語錄  
之說通解經文則人與一切昆蟲禽獸皆當各循其

性以為道昆蟲禽獸之道皆可修之以為教不知禽獸之道如何修之以為教如何教人於禽獸之道如何不可須臾離皆不可曉人物之性不同孟子已有明論集註亦曰以氣言之則知覺運動人與物若不異也以理言之則仁義禮智之稟豈物之所得而全哉此人之性所以無有不善而為萬物之靈也其說當矣以彼證此是非了然而纂疏又引真氏之說曰朱子於告子生之謂性章深言人物之異而於此章

乃兼人物而言生之謂性以氣言者也天命之謂性以理言者也以氣言之則人物所稟之不同以理言之則天之所命一而已矣此章兼人物而言尚何疑哉觀此一說人物不同者既以為是人物同者亦以為是阿蔽甚矣然集註以氣言者為同真氏反以為異集註以理言者為異真氏反以為同真氏本欲曲合文公之意而不自覺如此之差也嗚呼人性與物性不同此特眼前事甚不難見世之曲說何其多也

惻隱羞惡辭讓是非之心人皆有之未聞牛羊犬豕  
皆能與人同有也只解性為人之性自無許多節病  
天命謂性以理言也理為衆善之宗三綱五常皆所  
從出天命人由此理而生具五常之善以為性故曰  
天命之謂性物欲非性也人惟循此本然之性各就  
人倫職分之當然而行君仁臣敬父慈子孝兄友弟  
順夫義婦節朋友有信是則所謂道也申明此道使  
人行之是則所謂教也率性謂循自己本然之性非

循他物之性也道亦自己當行之道非他物各有之道也率性為道明德之事也修道為教新民之事也道也者不可須臾離也可離非道也○註道者日用事物當行之理皆性之德而具於心無物不有無時不然所以不可須臾離可離皆外物矣

道與理當有分別不可混而為一也道者事物相接往來交通之道路也理猶事物之脉理文理而為道之準則也道則依循此理而行理以貫道道必循理

此其道理之分也今註文直截解道為理則理亦是  
道道亦是理理與道既已不分道果何道不可得知  
所謂性之德而具於心者此惟言理則可言道則不  
可又言無物不有無時不然并下文外物云者皆不  
見其道之不可離與可離之的切實理而或問與纂  
疏所引諸人之說旁牽曲衍不勝其繁大槩不過專  
以扶同註文而已皆不必辨蓋道謂三綱五常之道  
君子之所以正心修身齊家理世皆此道也有身而



無此道則心不正行不修其身必辱有家而無此道  
則父不父子不予其家必壞有國而無此道則君不  
君臣不臣其國必亂此其所以不可須臾離之也若  
異教異術出天理人倫之外與三綱五常不相干涉  
有則於世無所益無則於人無所損凡其如此不急  
於用人皆可得而離之者俱不可以為道故曰可離  
非道也

是故君子戒慎乎其所不睹恐懼乎其所不聞○註君

子之心常存敬畏雖不見聞亦不敢忽所以存天理之本然而不使離於須臾之頃也

此一節所以申明不可須臾離道之意與大學第六傳小人閒居為不善之一節意正相對皆是警戒後人之言解者不可虛務高遠須要分明說出必能使人恐懼之實事義乃可通今註文只說存天理之本然誠未見其警動人心使之知恐知懼之實理所在又其雖不見聞一句或謂人不見聞或謂已不見聞

意亦不明或問中說其所不睹不聞為已所不睹不  
聞說下句獨字為人所不睹不聞然經中實無分別  
人已之文自戒慎乎其所不睹至君子慎其獨也五  
句相連只是一意慎獨一句乃其上四句之結語豈  
容有如此之分邪或問執定分為兩說自問自答幾  
二千言輯略語錄又數千言皆不見有公平之論盡  
欲辨之則不可勝辨今但直解本經而已戒慎乎其  
所不睹恐懼乎其所不聞本說人所不睹不聞蓋人

之私心於四通八達衆人耳目交會之間不須隄防自然斂束不敢恣縱及在隱暗之中獨居之處則坦然放肆以為雖有不善他人不知也然誠於中則形於外人之視已如見其肺肝自古以來大姦大巧暗昧中所為之惡未聞曾有人不知者故君子之於人所不睹不聞之際益加戒慎恐懼所以閑其邪惡之心不使得為邪惡之事也

莫見乎隱莫顯乎微故君子慎其獨也○註隱暗處也

微細事也獨者人所不知而已獨知之地也言幽暗之中微細之事跡雖未形而幾則已動人雖未知而已獨知之則是天下之事無有著見明顯過於此者

幽暗之中微細之事跡猶未形人猶未知但以已獨知之便謂天下之事無有著見明顯過於此者假如大惡之事跡已發見非獨已知人共知之昭昭然衆目所視衆手所指者反不謂之著見不謂之明顯乎或問再廣註文之意為說迂曲尤多中間却有一說

云又況既有是心藏伏之久則其見於聲音容貌之間發於行事施為之實必有暴著而不可掩者又不止於念慮之間而已也此亦見前說未安復為此說也然猶未免有兩圖之意不能全是微字本亦訓隱經文以隱為見之對以微為顯之對則隱與微皆取幽暗之意而言兩句只是一意註文疑其言有重複故解微為細事以致牽強不通蓋不察顯乃見之變文微亦隱之變文也此與有若無實若虛危而不持

顛而不扶事死如事生事亡如事存之語句無異皆其變文重言之也何獨疑於此哉大抵人之處身行事在青天白日衆人之中雖小人亦知所慎在幽暗偏僻獨居之處雖君子亦有所忽故私邪之心每由此生私邪之事每由此成古今天下著見明顯之惡未有不從幽暗隱微之中而起者無惡不自隱而見故曰莫見乎隱無惡不自微而顯故曰莫顯乎微君子審其如此故雖暗室獨居暗地獨行尤須密加嚴

慎也

致中和天地位焉萬物育焉○註致推而極之也位者  
安其所也育者遂其生也自戒懼而約之以至於至靜  
之中無少偏倚而其守不失則極其中而天地位矣自  
謹獨而精之以至於應物之處無少差謬而無適不然  
則極其和而萬物育矣蓋天地萬物本吾一體吾之心  
正則天地之心亦正矣吾之氣順則天地之氣亦順矣  
故其效驗至於如此



註言自戒懼而約之以至極其中而天地位矣自謹獨而精之以至極其和而萬物育矣推詳此說天下人中但有一人於不睹不聞之處戒懼以謹其獨便能使天地各安其所萬物各遂其生未之聞也又云盖天地萬物本吾一體吾之心正則天地之心亦正吾之氣順則天地之氣亦順義愈難通天地萬物與吾同在陰陽大氣中謂同一氣則可謂為一體則不可天下萬物何所不有豈能同為一體哉天地之氣

固有順不順時天地之心未嘗不正也豈待吾之心  
正然後天心地心始正哉天地之氣有時而不順者  
盖由國家失德則有恒雨恒暘恒燠恒寒恒風之應  
此皆天地不順之氣也普天之下惟吾一身之氣順  
便能使此氣皆順久雨則能使之晴久旱則能使之  
雨斷無此理或問亦曰三辰失行山崩川竭則不必  
天翻地覆然後為不位矣兵亂凶荒胎殯卵殪則不  
必人物消盡然後為不育矣若此者豈非不中不和

之所致又安可誣哉彼達而在上者既有以病之則夫災異之變又豈窮而在下者所能救也哉此說大意却是然與吾之氣順則天地之氣亦順之說豈不自相矛盾邪繼此復改一說云但能致中和於一身則天下雖亂而吾之天地萬物不害其為安泰此又有涉荒誕實流入於異端矣於目前見有之天地萬物之外又別有吾身之天地萬物不可曉也孟子言萬物備於我蓋謂萬物之理具於吾心非謂天地之外

別有天地萬物之外別有萬物在吾一身之中也推  
原或問本意蓋亦只是說天下雖亂而已之心能獨  
安也且天下遭亂生民之命朝不保夕已在其間心  
獨安之可謂仁乎經文自喜怒哀樂至萬物育焉此  
一段與上文本難通說當自為一章喜怒哀樂之未  
發謂之中發而皆中節謂之和此就各人之一身而  
言中也者天下之大本也和也者天下之達道也此  
義散開在於天下矣繼言致中和天地位焉萬物育

焉此乃專言天下之中和解者不可只就一人之身  
為說也然其致此者惟人君能之如堯之親睦九族  
平章百姓協和萬邦此其致天下中和之道也至黎  
民於變時雍則天下之中和成矣民人和則天地之  
和應而無三辰失行山崩川竭災異之變天氣和於  
上地氣和於下此之謂天地位也天地位則風雨寒  
暑各以其時人與物皆康寧蕃息此之謂萬物育也

四書辨疑卷十四

欽定四庫全書

四書辨疑卷十五

元 陳天祥 撰

中庸

道之不行也我知之矣知者過之愚者不及也道之不明也我知之矣賢者過之不肖者不及也○註知者知之過既以道為不足行愚者不及知又不知所以行此道之所以常不行也賢者行之過既以道為不足知不肖者不及行又不求所以知此道之所以常不明也

知乃智之事行則賢所能於智愚止可言知於賢不  
肖止可言行智者過之止可解為知之過愚者不及  
止可解為不及知賢者過之止可解為行之過不肖  
者不及止可解為不及行註文為見前一節行與智  
愚相配為言後一節明與賢不肖相配為言故以知  
與行兩相遷就交互言之牽強甚矣夫道在世間必  
須先明然後能行必先不明然後不行下章註云由  
不明故不行此言是也明字本當在前今反在後行

字本當在後今反在前乃後人傳寫之誤也行明二字  
當相易讀之解者宜云道不明者由其智者知之過  
愚者不及知此道之所以常不明也道不行者由其  
賢者行之過不肖者不及行此道之所以常不行也  
智者知之過如著書傳道而為過高過深之論者是  
也賢者行之過如摩頂放踵而為愛無差等之行者  
是也二者俱為害道然行之過者誤人淺知之過者  
誤人深孟子曰所惡於智者為其鑿也由此觀之解



經而務鑿孟子之罪人也

道其不行矣夫○註由不明故不行此章承上章而舉其不行之端以起下章之意

註文為見本經中無話可說故曲就上下兩章而言也予謂經文惟此一句中間又無所言之事似難獨為一章正與大學此謂知之至也之一句相似必有闕文不可強說

人皆曰予知驅而納諸罟獲陷阱之中而莫之知辟也

人皆曰予知擇乎中庸而不能期月守也○註罟網也獲機檻也陷阱坑坎也皆所以擒取禽獸者也言知禍而不知辟以況能擇而不能守皆不得為知也

驅字是一章中緊要字而註文略不言及又不細推罟獲陷阱所喻者何事乃云知禍而不知辟以況能擇而不能守蓋不知罟獲陷阱所況不在擇守也驅者言其身為物欲所驅也罟獲陷阱以況物欲陷人之禍害也人皆自謂我有智慮及見美色珍貨富貴

大權有私便可圖之隙則其攘奪之心奮然而起驅其身或為姦為盜為亂臣賊子納之於辱身喪命亡家覆族之禍害中而不知辟與其雖亦擇乎中庸而不能期月守者皆不得為智也

社金革死而不厭○註社席也金戈兵之屬革甲冑之屬

註文止是訓字未嘗通解其文訓社為席乃是席金革死而不厭席字難說社訓卧席亦訓卧褥卧席卧

褥皆人寢息所安者也衽金革盖言嗜金革如嗜卧  
席卧褥之安雖死於其間而不厭此北方之強也

君子之道費而隱夫婦之愚可以與知焉及其至也雖  
聖人亦有所不知焉夫婦之不肖可以能行焉及其至  
也雖聖人亦有所不能焉○註費用之廣隱體之微君  
子之道近自夫婦居室之間遠而至於聖人天地之所  
不能盡其大無外其小無內可謂費矣

解費為用之廣大意則是再審如何是用之廣却無

明說解隱為體之微體字蓋以道體為言不知指道  
為何道何者為道體也其言夫婦居室者蓋以夫婦  
作夫妻說也夫婦之愚解為夫妻之愚凡為夫妻者  
豈皆愚乎夫婦之愚夫婦之不肖二夫婦字與造端  
乎夫婦之夫婦義本難同若只解為愚夫愚婦乃為  
通順又觀聖人天地所不能盡之一句且論聖人不  
能盡若以亦有所不知亦有所不能之經文為解猶  
有可說然已幾於莊子註郭象矣再論天地不能盡

若以天地之大天下莫能載之經文為解則是東南西北至其天地盡頭無天地處君子之道猶遠天不能盡地不能載盡也以此為用之廣不知天地盡了之外又有何人廣用此道也或問又解隱字曰隱之為言正以其非言語指陳之可及耳此說亦非君子所行之道何嘗有言語不可及者哉隱字本指理之微妙難見者而言見則言語可以及矣然此章大要先須指定道是何道乃可說也蓋君子之道三綱

五常是也斯道也古今天下君臣父子夫婦長幼朋  
友之間無時可離無處不有所用之廣如此所謂  
費也中間如仁義禮知孝弟忠信之屬人雖日用  
之而能得其正理者鮮矣仁或流於姑息敬或墮於  
阿諛慈或敗于孝或陷父又前人經解中所辨仁恕  
忠恕忠信之分道理權經和同之別如此之類終無  
定說者多矣其理微妙難見如此所謂隱也註文或  
問於聖人不知不能處亦說不通蓋聖人不知以學

言聖人不能以位言不得其學則不知不得其位則不能且其一身一家常用之事如父子之親夫婦之別長幼之序雖愚夫愚婦亦皆可知亦皆能行及其化為治國平天下之用如禮樂憲章前王制度聖人雖稟上智之姿不得其學則亦有所不知也故孔子問禮於老聃問官於郕子然後能知此可見得其學則無有不可知者也雖已知之不得其位則亦有所不能也故孔子為中都宰一年四方則之攝行相事



三月魯國大治此可見得其位則無有不能行者也  
若於君子之道得其學亦不能知得其位亦不能行  
何足為聖人乎予於此章知此而已自天地之大以  
下義多難曉其間或有脫誤衍文不敢強解註文或  
問輯略語錄重重複複幾五十餘言皆無明白可通  
之說如天地之大人猶有所憾註文解為覆載生成  
之偏或問再與註文為註云天能生覆不能形載地  
能形載不能生覆以此為覆載生成之偏亦皆未是

天覆地載乃天地之正理不可謂之為偏也況天地之覆載與君子之道亦不相干人亦未嘗有憾於天不載而地不覆也又如鳶飛戾天魚躍于淵諸家詩解各有異同程子曰此一節子思喫緊為人處活潑潑地或問又引程子之言曰與必有事焉而勿正心勿忘之意同活潑潑地反覆參詳終不見活潑潑地義理安在必有事焉而勿正心勿忘勿助長也予於孟子集註已有辨矣豈可與鳶飛魚躍同說哉或問又曰

子思於此指而言之惟欲學者默而識之則為有以洞見道體之妙又曰苟能超然默會則道體之妙已躍如矣又有一說言楊龜山得鳶飛魚躍之理於意言之表信如此等之說則是中庸之義止可默識不可以文字語言發明之也嗚呼聖人立言設經為教以傳道後人所得之道一皆出自於經須其師友講說然後能明寧有不容言語指陳止可超然默會者哉使學者襲此成風凡遇難明之理皆可自謂吾已

默識默會於心洞見道體之妙在吾目前已躍如矣  
問之則曰此非言語指陳可及以此虛誑互相迷惑  
害道誤人孰甚於此纂疏又引語錄一說問中庸編  
集得如何曰便是難說緣前輩諸公說得多了儘有  
差舛處又不欲盡剝難他所以難下手不比大學都  
未曾有人說此話亦似未公四書中前人註說之多  
者孰如論語雖有差舛何嘗有礙後人之識見哉中  
庸一書本多難解大學傳文亦頗相類蓋此書與大

學本皆各為一經歷戰國之亂經秦火之厄雖能僅存世無知者漢儒採集附於禮記中列為二篇與諸篇相混無別非二程先生不可得如今日矣大迹既已如此則其章句中傳寫之差必不能無所不知者止當置而勿解不可歸罪前輩諸公責其說者之多也語錄又曰中庸之書難看中間說鬼說神都無理會予謂此數語真是文公本意其實亦有不盡知者況我輩乎說者但無自欺之蔽知之為知之不知為

不知如是而已可也

伐柯伐柯其則不遠執柯以伐柯睨而視之猶以為遠  
故君子以人治人改而止○註睨邪視也言人執柯伐  
木以為柯者彼柯長短之法在此柯耳然猶有彼此之  
別故伐者視之猶以為遠也

註文既訓睨為邪視於通說處却單撤去睨字不復  
有閑邪視之意前言長短之法彼此無別後句却言  
猶有彼此之別經文本謂睨視者誤以其則為遠註

文於睨視一節却解為其則實遠意皆有差蓋睨視  
持疑不決之貌手中執柯以伐柯彼柯長短只此柯  
是其定則其則至近甚不難見而乃側視傍觀持疑  
不決則是所見不明猶以其則為遠也以自己之心  
度他人之心無不同者己心所欲之善事人亦欲之  
己心所惡之惡事人亦惡之忖度他人之心只自己  
之心是其定則此之謂其則不遠也彼亦人已亦  
人也見彼人道有差以己人道治而正之此之謂以

人治人也彼既能改有耻且格便當善待不須更治此之謂改而止也若已改過自新而猶治之不已人或以此加之於已蓋亦已之所惡如此等事已亦不可加之於人此之謂施諸已而不願亦勿施於人也忠恕違道不遠施諸已而不願亦勿施於人○註施諸已而不願亦勿施於人忠恕之事也

註文本意蓋指忠恕為一事不欲使有分別也然以實理言之心無私隱之謂忠推已不欲勿施於人之



謂恕忠自是忠恕自是恕豈可併而為一哉程子言  
事上之道莫若忠待下之道莫若恕此亦分忠恕為  
兩事其意本是而或問非之以為不當析之為二無  
無恕之忠無無忠之恕若準此說為例天下道理中  
亦無無仁之義無義之禮無禮之智仁義禮智亦當  
通為一事不可析之為四也此皆知之過者之病學  
者尤當慎之也或問又引論語中忠恕為說云盡已  
推己乃忠恕之所以名曾子之言蓋指其不可名之

妙而借其可名之粗以明之學者默識於言意之表則亦足以互相發明而不害其為同也此又以忠恕止當默會於心不可以言語解說也言語可說者為忠恕之粗不可說者為忠恕之妙也徧覽堯舜禹湯文武伊周孔孟之言皆無如此差異之論聖人經世理人之道至精至妙者載在經典備矣何嘗有不可言說止可默識於言意之表者哉此等話前論中已嘗正之予亦自厭其繁不欲再加詳辨也施諸已而

不願亦勿施於人此只是恕經文與忠兼言者正與禹稷當平世三過其門而不入之文相似予於孟子中已有其辨可就觀之違道不遠又與孟子言強恕而行求仁莫近焉之意正相類仁包五常而為人道之本恕最近仁故言違道不遠也

故大德必得其位必得其祿必得其名必得其壽○註  
舜年百有十歲

註言舜年百有十歲又解下文大德者必受命之一

句云受天命為天子也以此言舜義固不差如孔子之至聖大德賢於堯舜而乃不得其位不得其祿年又止於七十有三顏子以亞聖之德居於陋巷簞食瓢飲年纔三十二而終與舜豈可通論哉蓋經文專指事之當然而言未嘗與時無論也夫大德者必受天命必得位祿名壽四者俱全惟天運開泰至盛之時乃能如此若陽消陰長君子道衰則大德之人必無全能有此四者之理此皆天人相關自然之道學

者不可不知也

事死如事生事亡如事存○註始死謂之死既葬則曰  
反而亡焉

始死為死既葬為亡諸字書皆無此說果如註文所  
言則事死如事生之一句止是說事其初死者當如  
事生既葬之後春秋祭祀皆不必有如事生之敬也  
豈通論乎況死與亡既有始死既葬之分則生與存  
亦當分為兩說今生存二字却皆仍舊何也又諸書

中言人亡國亡者不可勝數孔子執伯牛之手曰亡之書言有一於此未或不亡如此之類亦何嘗有開既葬之意哉經言事死如事生事亡如事存亡乃死之變文存乃生之變文死便是亡亡便是死生便是存存便是生難容更有如此分別也

忠信重祿所以勸士也○註忠信重祿謂待之誠而養之厚

註言待之誠蓋以誠字解忠信又以忠信為人君之

忠信也豈有君忠於臣者哉只論待之誠三字義亦難通於九經中觀之身與賢親大臣羣臣庶民百工遠人諸侯皆當待之以誠非獨於此一處當用誠也然於羣下亦須分辨賢否若於邪惡之人待之以誠敬養之以重祿則賢者必思退隱不可謂之勸士也忠信重祿本繼上文體羣臣一節而言忠信止可說在羣臣體謂體察辨認也此與孟子言國人皆曰賢然後察之意同言於羣臣中審詳體察見有忠信賢

善之實者厚其祿賜以旌顯之則士皆景慕樂於為善是之謂忠信重祿所以勸士也孔子言舉直錯諸枉能使枉者直舉善而教不能則勸義皆相類

成己仁也成物知也○註仁者體之存知者用之發

註與經文意不相對又不知說體為何者之體用為何者之用也仔細詳觀似謂體為道之體用為道之用然經中實無闕該道體道用之處存發二字亦生澁難看註中本要見何者為成己何者為成物成己者



如何是仁成物者如何是知如此以解本經可也夫  
學以明德乃成已也教以新民乃成物也孟子引子  
貢贊孔子之言曰學不厭智也教不倦仁也此以成  
已為智成物為仁子思却說成已仁也成物知也二  
說不同不容不辨蓋子貢以心言子思以事言思欲  
成已之心屬智如終日不食終夜不寢以思無益不  
如學也者是也所行成已之務為仁如崇德修慝克  
己復禮者是也思欲成物之心屬仁如己欲立而立

人已欲達而達人者是也所行成物之務為智如聖  
人設科為教以傳道高下淺深各隨其材以授之中  
人以上可以語上中人以下不可以語上者是也  
此為解則二家之說皆通矣予舊嘗有說曰成己之  
心智也所以成己者仁也成物之心仁也所以成物  
者智也此最簡直易言然又恐人未曉故有如許之  
曲折也

子曰吾說夏禮杞不足徵也吾學殷禮有宋存焉○註

夏禮既不可考證殷禮雖存又非當世之法


語云夏禮吾能言之杞不足徵也殷禮吾能言之宋不足徵也此亦孔子之言今日吾學殷禮有宋存焉却是宋守殷禮未嘗有闕不可謂宋不足徵孔子之言何其翻覆如此邪況世衰道喪古禮皆亡夏禮既無可取證於杞殷禮亦豈能獨存於宋以此推之當取論語為正中庸文有傳寫之差難謂兩經俱是也上焉者雖善無徵無徵不信不信民弗從下焉者雖善

不尊不尊不信不信民弗從○註上焉者謂時王以前如夏商之禮雖善而皆不可考下焉者謂聖人在下如孔子雖善於禮而不在尊位也

夏禮吾能言之殷禮吾能言之殷因於夏禮所損益可知也周因於殷禮所損益可知也此皆孔子之明論蓋前王禮典當時皆在夏禮商禮俱有考據故孔子自謂能言又云可知也然其禮之文雖在禮之實皆亡如云杞不足徵宋不足徵本言先王之禮久廢

雖其後嗣亦無可以取證之實此特傷其禮之不行  
非謂夏商之禮皆不可考也子思必無不取聖祖之  
言別為如此異論之理王天下有三重焉其寡過矣  
乎此兩句本是上章結語摘屬此章非也中庸章數  
差互者甚多他日必有能辨之者此章自上焉者以  
下皆是通論君子之道本非專說禮之一事也試於  
下文故君子之道本諸身徵諸庶民之十二字中仔  
細觀之則一章之本意可見上焉下焉皆以位言在

上之人徒有仁心仁聞而民不被其澤此之謂上焉  
者雖善無徵也在下之人道同前聖前賢而身不在  
其位此之謂下焉者雖善不尊也無徵不尊民不信  
從理勢之自然也



四書辨疑卷十五